

Il model stat – uss vai mo pli per detagls en la lescha d'immigraziun

Il cussegl dals chantuns ha chattà ier in cumpromiss equilibrà

■ (anr/vi) **Tuttas differenzas cun il cussegl naziunal n'èn anc betg lugadas, ma il cussegl dals chantuns ha chattà ier plirs cumpromiss per las ultimas dumondas avertas tar la realisaziun da l'iniziativa d'immigraziun. Grondas midadas n'èn betg pli da spegtar.** Il model vesa ora sco suonda: L'emprim decida il cussegl federal mesiras per trair a niz meglier il potenzial da forzas da lavur en Svizra. Sche la dischoccupaziun en tschertas branschas u regiuns economicas surpassa la media po il cussegl federal decider ulteriuras mesiras per promover ils dischoccupads ch'èn registrads tar il RAV. Il cussegl naziunal aveva anc decidì che la dischoccupaziun stoppia esser «considerabla» per prender ulteriuras mesiras, vul dir ch'i dovria ina quota da dischoccupaziun da 10 fin 15 pertschient. Il cussegl dals chantuns ha curregì ier quest detagl e definì che la dischoccupaziun stoppia simplamain crescher «sur la media».

Obligaziun d'annunziar plazzas libras

Là nua che la dischoccupaziun surpassa la media sto il patrun annunziar sia plazzas



Immigraziun, in dossier difficil per cussegliera federala Simonetta Sommaruga. KEYSTONE

za libra al center per dischoccupads (RAV). Lez trametta al patrun entaifer curt temp dossiers d'intginas – en general vegn discurre da tschintg – personas adattadas che tschertgan lavur. Il patrun envida candidats valabels ad in discurs da preschentaziun. Il resultat ha el suentar

d'annunziar al RAV. Il patrun n'è dentant betg sfurzà da tschentar en ina da questas personas.

Ina discussiun chalirada hai dà ier davart excepziuns da l'obligaziun d'annunziar plazzas libras. Il cussegl naziunal aveva decidì ch'in patrun na stoppia betg an-

nunziar la piazza libra sch'el engaschia da sai anora gia in dischoccupà dal RAV. Ina minoritad en il cussegl dals chantuns ha preferì la varianta veglia che l'obligaziun croda era sch'il patrun engaschia in indigen che n'è betg dischoccupà. Cun 28 cunter set vuschs ed otg abstenziuns ha il cussegl dals chantuns suandà la varianta dal cussegl naziunal che priorisescha ils dischoccupads.

Dretg internaziunal vala en mintga cas

Il cussegl naziunal aveva plinavant scrit en la lescha che las mesiras stoppian mintgamai resguardar il dretg internaziunal. Il cussegl dals chantuns ha stritgà quest passus cun l'argument ch'ins stoppia gea adina resguardar il dretg internaziunal, quai prescriviva la constituziun. Era la ministra da giustia *Simonetta Sommaruga* ha pledà per stritgar il passus: «Sch'ins cumenza uss a scriver en mintga lescha ch'i saja da resguardar il dretg internaziunal pudesan ins gea anzi sa dumandar tge che vala sche quai na stat ina giada betg scrit.»